

Man byndt eym yeden vor das in
Das er nit vordern soll das syn/
Vnd lossen yeden in sym stadt/
Wie ers biß har gebruchet hadt
Durch gott/ jr fürsten sehen an
Was schad/ zü letst dar vß werd gan/
Wann joch hyn vnder kem das rich
Ir blyben ouch nit ewigklich/
Eyn yedes ding me sterckung hatt
Wann es bynander gsamlet stat
Dann so es ist zerteilt von eyn/
Eynhellikeyt in der gemeyn
Vffwachsen die bald all ding macht
Aber durch mißhell/ vnd zwytracht
Werden ouch grosse ding zerstört/
Der tüttschen lob was hochgeert
Vnd hatt erworben durch solch rüm
Das man jnn gab das keyserthüm/
Aber die tüttschen flissen sich
Wie sie vernychten selbst jr rich
So mit die stüdt zerstörung hab
Bissen die pferd jr schwantz selb ab/
Worlich yetz vff den füßen ist
Der Cerastes/ vnd Basylist/
Mancher der würt vergyfften sich
Der gyfft dar schmeycht dem Römische
Aber jr herren/ künig/ land/ /rich
Nit wellen gstaten solch schand
Wellent dem Römischen rich zü stan
So mag das schiff noch vff recht gan

Steylt
war

